

Quiroga zo aytcusir



**Tana rupa ke
*Stuvatum ke Crakeik tota***

(c) Damien Etcheverry

Xantof krent kan Kotava. Ewaweem daskiyin
gan Copilot TG- talpey.

Xanto : Stuvatum ke *Crakeik tota* ;
Quiroga zo aytcusir (6-e otuk, 2026).

Krentara is ponara is piskura skuyuna
gan Damien Etcheverry (2026).

1-e ~ Radimi egale

Darekeon. Espanaf folk ke San Lorenzo gan tcordiktum ke *Crakeik* tota dirgana gan vartafa Marjorie Oluikya ba gazda darevielon zo zonesteyer. Onsera tiyir belikafa azen doaliera liafa numen axafa virutsa ke folk kalion zo lev-plawayar. Don Gonzalo de Quiroga dirgasik ke folk va duntura gonogorayar enide va stakera va detikeem tatceyer. Tcordik va jwa inon gosuna vangiyid aze... mo bira vumelton dimlapiyid. Quiroga tir burdafa vox umbeyena, lente egale, va munesteks pu ticefa rictaga ke Cartagena re govosutelar.



2-e ~ Quiroga ton gojuca

Dirgasik gu volsafa pestaka zo remfir. Wetce ronkaf fayik ke tana targafa oluayasa ke Espana, zo plukeper. Folk rundayan leve inafa bloduca onsenon zo levrotiyir, ina tire al tiner. Isen jwa dem moava is aka odiayana pu ina gan tcordiktum zo elakeyer. Quiroga mu sinaf okilik govoduntur, mu bata Marjorie Oluikya... mu ayikya. Va inafa ewava sol intaf trak me rotaloyar, inya al slur, al lunter. Va ina al woer, i va bagaliakiraf sayakik. Toktanya bata bulikya en tir ?



3-e ~ Kadim oblay

Luxe bet tcordaf blay ec dam tel ke Marjorie Oluikya, bali ke ceneniktum co tiyir mulafi : volsaasa xonuka ! Voxen Quiroga mu lantanya dikisa va krets-iskafa vartuca koe varafa Kariba gola xaayar. Viele liza en zo tazdayar, pune duntuyur, umbeteson va bli ke mon decemoy virutsik. Tcordik va sin gu vlardafa fuxedja ke folk anton ko-budeyed. Quiroga dirgasik tiyir ironokik stayan kadim oblay. Abdida va sin jovleyer, Marjorie Oluikya laniyir ise va ina olukon kiavayar. Voxise dace kicegayar, ton lana dofuguca...



4-e ~ Lipi, va fala... ok me

Tcordik al bosayad. Radimi da va int is kaip ten kototayad, pune va tanoy espanaf malstayan sayakik moe piluda tunuyayad, dem tselkeem ke fuxedja ke folk. Numen to bat sayakik va dositaf virutsikeem don Quiroga dirgasik di tunuyayar. Banvulon va lipimi sutedayani gan Marjorie Oluikya pu ina bulkayar, i lipi lize inya espanavon al suteyer : « *Buena suerte* »(Va falanya). Don Gonzalo va lipi nariyir numaze zo skaltepeyer. Ina va falanya galpeyer kire, kore va inafi bli al umbeyer, pune grupeyer da inaf ticokilik, i bantan, mileke rotir me di koxuyud !



5-e ~ Ori kaf stekeugal

Quiroga va munesteks gotenuker aze pu miv jadif bowesik va Cartagena gobulkatar. Kotvieli tir ronkafa gu intafa gazik isu patecta nume icde intyona rokla is xelkasa enja va betcoba vol preyutar. Tcordik va folk lajuvangiyid kiren ina va wupe me jiligayar nume me kiewon sabegayar. Va tokcoba artan ika ina co askiyir ? Ewava ke jwa artfid, azen brucka ke Marjorie Oluikya gazdon illanisa van bulafi bali, sol inafa swava me relvawer. Isen inafi lipimi kabdueon aykayani walzer. Fala, jontika fala fu tir adrafa enide ina va gejatregul lajutaruteter !



6-e ~ Koe bazaxo ke jadif bowesik

Koe berma ke jadif bowesik va Cartagena tigit, koe inafu tapegafu bazaxo. Don Gonzalo de Quiroga ta bulkara va intaf munesteks koon tigr. Jwapa kum moava is dilgava is aka inon gotumusayana koe folk ke San Lorenzo, gan tcordiktum zo elakeyer. Rupa koe varafa Kariba gola ixam zo gruper. Quiroga gruper da intafi bali, ik intafi bli dace rotir, zo vefakid. Bowesik va munesteks belir. Kadimeon toloy jadil fayik dere tigid, i inaf rontif okilik. Va tokcoba bowesik fu gorar ?



7-e ~ To Gejatregul titir

Quiroga gan jadiwik gades va trumindeem ke Nueva Granada ikagazaxo goleston zo buntur. Inafa frayer tir gomil. Golde ina, Espana va jwapa su drasur, i va pak ke tandeaf culiek staksen ko vo ta fukorlara va gazaf pol. Ostik, Espana re tir kipegara ke tamava. Tcordiktumam va lana tufa kou sujuyun folk al lajukoilkar, ika anton baroy xonukesik ! Bowesik va amlit anamsteger abdida va intaf goraks fu tiyar : nekev intafa oluafa ravalduga, Don Gonzalo de Quiroga zo soper aze ko Espana zo dimstakseter enide lente Gejatregul di zo malyerotatar. Gorara tir davafa.



8-e ~ Quiroga zo soper

Quiroga va berma ke bowesik bulur, ton busum aname nubaskeem. Su zo soper. Leve kawazdesa disukera ke yon aboyik koe lupaxama, ko flint ke Cartagena zo star lize kobudeyenon zavzagitir vieli gejatota ko Espana di statar lize gan Gejatregul zo malye-rotatar. Inafi bali tir orikafi, inafa klepa zo arber, dace rotir tere tulon zo klibutur. Sayakaf gazaf malyerot loviele tir durulaf.



9-e ~ Van Espana is bali

Quiroga koe fuxedja ke flint ke Cartagena remi tandamu su abiler. Tir burdafa, va intafa oklafa tiva al drasur. Savsaf dirgasik va San Lorenzo re anton tir konaf stolenik. Asuk va ina ko Espana re star lize ina zo komalyeter. Kotvielon va azeba ronoticlanir enide va suka ke grocela kagaelar, bokson enintenon gan sayakik. Koe siel, koe rujod, lana presafa ewava ke ayikya lenteon zovdawer, i setikera va Marjorie Oluikya, i ne mea rotaloyane.



10-e ~ Kevlapira moe bira

Espanaf gijarotif asuk moe Atlantika
welfa lapir, leve sizuntas awalt. Iluon,
ital loloon tugijar, kona bovreda va in
vanlapir, ebeltaf tcordaf nilt tice dalaf
norisk manton ezar. Kas co tir vartafa
Crakeik tota ?

